

嘉靖惟揚志卷之二十二

人物列傳二

郡人盛儀輯

宋胡瑗李衡王居正傳

胡瑗字翼之如臯縣安定鄉人少與孫明復石守道同讀書泰山攻苦食淡終夜不寢十年不歸景祐初范仲淹知蘇州奏請立學延瑗為教授明年仲淹入朝又薦其通知古樂以白衣詔對崇政殿授校書郎復以保寧節度推官教授湖州慶曆中以疾致仕皇祐中起授國子監直講嘉祐初擢天章閣侍講仍治太學瑗患隋唐以來仕進尚文辭而遺經業苟趨利

人物傳二

惟揚志卷之三

一

祿及為蘇湖二州教授嚴條約以身先之雖大暑必公服終日嚴師弟子之禮懼懼為諸生言其所以治已而後治乎人者學徒千數日月刮削為文章皆傳經義必以理勝信其師說敦尚行實後為太學四方歸之庠舍不能容其在湖學置經義齋治事齋經義齋者擇疏通有器局者居之治事齋者人各治一事又兼一事如治民治兵水利筭數之類其在太學亦然其弟子散在四方隨其人賢愚皆循循雅飭其言談舉止遇之不問可知為先生弟子其學者相與稱先生不問可知為胡公也劉彝對神宗稱先生門人

在朝者曰若錢藻之淵篤孫覺之純明范純仁之直
溫錢公輔之簡諒皆陛下所知也瑗亦嘗言劉彝善
水利在太學時以顏子所好何學論試諸生得程伊
川所作大驚異之即請相見處以學職若山陽徐積
亦瑗高第弟子也嘉靖庚寅歲從祀孔子廟庭所著
有易傳十卷洪範解一卷春秋口義五卷皇祐樂記
三卷景祐樂府奏議一卷皇祐樂府奏議一卷吉凶
書儀二卷門人述安定先生言行錄二卷子志康登
慶曆六年進士仕終承務郎杭州觀察推官

李衡字彥平號樂庵江都人博學爲文操筆立就宣

人物傳二

惟揚志卷之三

二

和庚子入辟雍有同舍洛人趙孝孫者伊川高第弟
子趙顏子之子也於衡有十年之長家學有源勸衡
讀論語曰學非記誦詞章之謂所以學聖人也不可
有絲毫僞出入起居之時學也飲食游觀之時學也
疾病生死之時亦學也事業正自爲學中來衡心佩
其訓雖博通羣書而以論語爲根本登進士第授吳
江主簿有部使者怙勢作威衡不忍以敲扑迎合投
劾于府而歸後知溧陽縣專以誠意化民民莫不敬
夏秋二稅以期榜縣門鄉無吏跡而輸送先他邑歷
任四年獄戶未嘗繫一重囚隆興二年金人犯淮堧

官沿江者多送其孥，衡獨自浙右移家入縣，民心大安。盜蝟起旁境，而溧陽靖晏自如。轉運使韓元吉等列上治狀，進一秩，尋召入爲監察御史，司封郎中，樞密院檢詳，出知溫、婺、台三州，加直秘閣。而衡引年乞身，懇請不休，上屢却其奏，除秘閣脩撰，致仕。上思其樸忠，旋召除侍御史，以老固辭，不獲命。差同知貢舉會外戚張說以節度使掌兵柄，衡力疏其事，謂不當以母后肺腑爲人擇官。廷諍移時，改除起居郎。衡曰：「與其進而負於君，孰若退而合於道。」章五上，請老益力。上知不可奪，仍以秘撰致仕。時給事中莫濟不書

人物傳二

惟揚志卷之二十二

三

勅翰林周必大，不草制。右正言王希呂亦與衡相繼論奏，同時去國。士爲四賢詩以紀之。衡後定居崑山，結廬別墅，聚書踰萬卷，自號樂庵。每曰：「吾平生操心行已，立朝事君，皆趙君之言，有以發之。臨沒冠櫛，脩然而逝。」史論曰：李衡進退雍容，幾於聞道。所著有易說論語說樂庵文集若干卷，易義海撮要十五卷，門人龔昱記樂庵語錄五卷行世。

王居正字剛中，號竹西，揚州人。嗜學晝夜不息，熙寧中，王安石以新經義頒天下，其後張蔡更用事，槩以王氏說律天下，士居正獨非之，未嘗肯作新進士語。

流落不偶餘十年黨友勸居正少自貶居正歎曰一第自有時心之是非可改耶舉宣和三年進士第二范宗尹力薦其直諫孝友當今無革命對便殿且條仁宗聖訓十事以獻上甚說撫州守言甘露降圖以聞居正請却其圖勿納上方嚮規諫居正次前世聽納事爲集諫十五卷以開廣上意詔以時務訪羣臣居正獻疏數千言其論省費尤詳知婺州貢羅主計者歲責輸視崇寧五萬疋居正三上章未報計司督趨旁午復手疏五不可以聞上卒如先生請得減其半轉運使移供御炭胡桃紋鶉鴿色居正論止之居

人物傳二

惟揚志卷之二十二

四

中書舍人兼史館脩撰言近習請託進擬不自朝廷因錄皇祐詔書以進上皆嘉納救弊補闕所還制勅甚衆其學根柢六經深純閎肆以崇是闢非爲已任叅稽雋艾鈎索聖蘊黜王氏詖淫龜山楊氏與居正會毘陵出所著三經義辨示居正曰吾舉其端子成吾志居正愈感厲首尾十年爲毛詩辨學十三卷詩辨學二十卷周禮辨學五卷辨學外集一卷上之又於帝前指陳安石釋經無父無君者帝作色曰是豈不害名教耶孟子關邪說正謂是矣先是居正與秦檜善檜爲執政論天下事甚銳旣相所言皆不酬居

正嫉其詭見帝曰請以所聞問檜檜銜之出居正於外其後檜專國居正請祠言不及時事客至談經訂史而已檜終忌之諷中丞何鑄劾居正爲趙鼎汲引欺世盜名奪職凡十年檜死復故職居正辨學與龜山義辨皆列秘府二書既行天下不復言王氏學其所著又有竹西集十卷西垣集五卷

張方平劉大中傳

張方平字安道其先宋人後徙揚州方平穎悟絕人凡書一閱終身不忘屬文未嘗起草舉賢良方正論中書樞密院不可以不合仁宗從之元昊之叛謀無

人物傳二

惟揚志卷之二十一

五

遺策雖不盡用然西師解嚴方平有力焉使契丹虜主雅聞其名與母后族人微行觀于范陽門外及燕虜主親酌玉卮飲之顧左右曰有臣如此佳哉騎而擊毬于前以其所乘馬賜之朝廷知之自是虜使挾事至者輒命方平館之元昊遣使求通已在界上而契丹與元昊結隙使來約我拒絕其使仁宗以答書示方平與宋祁方平上議賜詔元昊於西北爲兩得時人服其精識爲御史中丞中外之事知無不言至於宮妾宦官濫恩橫賜皆力爭裁抑之知貢舉士方以游言險語爲高方平上疏謂文章之變實關盛衰

不可長也詔以公言曉諭學者論河北榷鹽上大喜命公密撰手詔下之河朔父老相率拜迎於澶州爲佛老會者七日以報上恩自陝西用兵公私困乏士大夫爭言豐財省費之道然多不得其要方平皆爲上極言上益異之書文儒二字以賜出鎮西蜀始李順以甲午歲叛蜀人記之至是方以爲憂而轉運使攝守事西南夷有邛部川首領者妄言蠻賊儂智高在南詔欲來寇蜀攝守大驚移兵屯邊郡益調額外弓手發民築城日夜不得休息民大驚擾爭遷居昏會不復以年賤鬻穀帛市金銀埋之地中朝廷聞之

人物傳二

惟揚志卷之二十二

六

發陝西步騎戍蜀兵仗絡繹相望於道詔促方平行且許以便宜從事方平言南詔去蜀二千餘里道嶮不通其間皆雜種不相役屬安能舉大兵爲智高寇我哉此必妄也臣當以靜鎮之道遇戍卒兵仗輒遣還入境下令邛部川曰寇來吾自當之妄言者斬悉歸屯兵遣弓手罷城築之役會上元觀燈城門通夕不閉蜀遂大安已而得邛部川之譯人始爲此謀者斬之梟首境上而配流其餘黨於湖南西南夷大震英宗不豫學士王珪當直不召召方平赴福寧殿上憑几不言賜方平坐出書一幅八字曰來日降詔立

皇太子方平抗聲曰必賴王也嫡長而賢請書其名
上力疾書以付方平方平後事神宗論事益切至於
論用兵起獄尤爲反復申言曰老臣且死見先帝地
下有以藉口矣上爲感慟末樂之敗上頗思其言舉
蘇轍中制科世以爲知人卒謚文定

劉大中字立道揚子人父湜字持正政和間進士分
教處州不樂仕進自號拙堂居士大中經明行脩鄉
黨以爲醇儒大觀中賜上舍出身立朝剛正徧歷清
要是時脩史極天下之選得四人倪若川汪藻徐師
仁而大中與焉紹興三年權監察御史宣諭江南東

人物傳二

惟揚志卷之二十二

七

西路斥罷姦惡推薦善類不避權勢歸言泉司官吏
之費歲十三萬繕請省官屬從之四年遷右司諫言
契勘租稅條限災傷放免不盡者限一月祖宗以來
未之有改今戶部迫促太甚變亂舊制全不恤民夫
祀所以爲民祈福也迫取物帛反爲民害有傷和氣
有累聖德詔爲展限一月七年以兵部侍郎知處州
戢吏撫民所部肅然初民輸秋租恣下漁取無筭至
是始令人戶自槩吏不能擾未幾召還八年除禮部
尚書叅知政事嘗䟽中原陷沒東南之民死於兵火
疫癘水旱以致爲兵爲緇黃及爲盜賊餘民之存者

十無二三姦臣虐用誅求過數丁鹽紬絹最爲疾苦
愚民寧殺子而不願輸生女者又多不舉乞守令滿
日以生齒增減爲殿最又詔州縣村郭貧乏之家生
男女不能養贍者許於常平錢內人支四貫文仍委
守令勸諭父老曉譬禍福若奉行如法所活數多監
司保明推賞是年與丞相趙鼎合議以爲屈己和戎
不可秦檜怒薦蕭振爲御史劾罷之遂以資政殿學
士中大夫再知處州以疾乞閑差提舉臨安洞霄宮
寓居處城紫虛觀卒葬白雲山大中在朝言事切中
時宜至首議建儲尤爲懇切高宗爲之感悟賜以御
人物傳二 惟揚志卷之二十二 八

書陸機文賦括蒼志列賢守自唐李邕至宋黃葆光
十人而止新志宣和以後得三人而大中各居其一
孫覺孫覽傳

孫覺字莘老高郵人甫冠從胡瑗學瑗之弟子千數
別其老成者爲經社覺年最少儼然居其間衆皆推
服登進士第調合肥主簿歲旱州課民捕蝗輸之官
覺言民方艱食難督以威若以米易之必盡力是爲
除害而享利也守悅推其說下之他縣嘉祐中擇名
士編校昭文書籍覺首選進館閣校勘神宗即位直
集賢院爲昌王記室王問終身之戒爲陳諸侯之孝

作富貴二箴擢右正言神宗將大革積弊覺言弊政固不可不革革而當其悔乃亡神宗稱其知理嘗從容語及知人之難覺曰堯以知人爲難終享其易蓋知人之要在於知言人主用臣之道任賢使能而已賢能之分旣殊任使之方亦異至於所知有有限量所能有彼此是功用之士也可以處外而不可以處內可以責之事而不可責之言陛下欲興太平之治而所擢數十人者多有口才而無實行臣恐日浸月長彙征雜進充滿朝廷之上則賢人日遠其患尚可言哉願觀詩書之所任使無速於小利近功則王道可

成矣邵亢在樞府無所建明神宗欲出之用陳升之以代覺退即奏疏如所言神宗以爲希旨奪官兩級執政曰諫官有出外無降官之理神宗曰但降官自不能住覺連章去云去歲有罰金御史今茲有貶秩諫官未聞罰金貶秩而猶可居位者乃通判越州復右正言徙知通州熙寧二年詔知諫院同脩起居注知審官院王安石早與覺善驟引用之將援以爲助時呂惠卿用事神宗詢於覺對曰惠卿辨有才過於人數等特以爲利之故屈身於安石安石不悟臣竊以爲憂神宗曰朕亦疑之其後王呂果交惡青苗

法行首議者謂周官泉府民之貸者至輸息二十而五國爭之財用取具焉覺奏條其妄曰成周賒貸特以備民之緩急不可徒與也故以國服爲之息然國服之息說者不明鄭康成釋經乃以王莽討贏受息無過歲什一爲據不應周公取息重於莽時况載師所任地漆材之征特重所以抑末作也今以農民之絕將補耕助斂顧比末作而征之可乎國事取具蓋謂泉府所領若市之不售貨之滯於民用有買有予并賒貸之法而舉之儻專取具於泉府則冢宰九賦將安用耶聖世宜講求先王之法不當取疑文虛說

人物傳二

惟揚志卷之三

十

以圖治今老臣踈外而不見聽輔臣遷延而不就職門下執政而不行諫官請罪而求去臣誠恐姦邪之人結黨連伍乘衆臣之洶洶動搖朝廷鈞直干譽非國家之福也安石覽之怒覺適以事詣中書安石以語動之曰不意學士亦如此始有逐覺意會曾公亮言畿縣散常平錢有追呼抑配之擾安石因請遣覺行視虛實覺既受命復奏䟽辭行且言如陳留一縣前後曉示情願請錢卒無一人至者故陳留不散一錢以此見民實不願與官中相交所有體望賜寢罷遂以覺爲反復出知廣德軍徙湖州松江隄沒水爲

民患覺易以石高丈餘長百里隄下化為良田徙廬
州改右司諫以祖母喪求解官下太常議不可詔知
潤州覺已持喪矣服除知蘇州監倉官鄭伋倚宰臣
為姦覺至以伋屬吏按治不少貸徙福州閩俗厚於
婚喪其費無藝覺裁為中法使資裝無得過百千令
下嫁娶以百數葬埋之費亦率減什伍時欠市易錢
者繫獄甚衆適有富人出錢五百萬請葺佛殿覺徐
曰汝輩所以施錢者何也民曰願得福耳覺曰佛殿
未甚壞佛又無露坐者孰若以其錢為獄囚償官逋
使數百人釋枷鎖之苦其得福豈不多乎富人不得

人物傳二

惟揚志卷之三

十一

已諾之即日輸錢圜空虛連徙毫揚徐州徐多盜
捕得殺人者五其一僅勝衣疑而訊之曰我耕于野
與甲遇疆以梃與我半夜挾我東使候諸門不知其
他問吏法何如曰死覺誅其首後遂為例知應天府
入為太常少卿易秘書少監哲宗即位兼侍講遷右
諫議大夫時諫官御史論事有限毋得越職覺請申
唐六典及天禧詔書凡發令造事之未便皆得奏陳
論宰相蔡確韓縝進不以德確自訟有功無罪覺隨
所言折之確竟去縝白遷覺給事中辭曰間者執政
畏人議已則遷官以餌之願與縝俱罷踰月縝去進

吏部侍郎領右選右選萬五千員闕纔五之二至有三年不得調者覺請自軍功保甲進者補指使宗室袒免從員外置日得闕數千改主左遷請磨勘歲以百人爲限擢御史中丞數月以疾請罷除龍圖閣學士兼侍講提舉醴泉觀求舒州靈仙觀以歸哲宗遣使存勞賜白金五百兩卒年六十三覺有德量爲王安石所逐安石退居鍾山覺枉駕道舊爲從容累夕追其死又作文以誄談者稱之紹聖中以覺爲元祐黨奪職追兩官徽宗即位復官職有文集奏議六十六卷春秋傳十五卷周易傳十卷記室雜藁三卷外集

人物傳二

惟揚志卷之三

十三

十五卷

覽字傳師覺之弟也幼警悟擢治平二年進士知尉氏縣有屯將遇下虐士卒謀因大閱殺之以叛覽聞之馳往士猶羣語不顧覽呼諭之曰將誠無狀然天子何負汝輩乃欲致族滅耶皆感謝去將徐至覽命吏趣具奏衆意遂安神宗壯其材以爲司農主簿舒亶判寺且兼諫院欲引覽自助覽拒不答亶怒用帳籍違事劾之出提點利州湖南常平改京西轉運判官入爲右司員外郎荆湖開疆命往相其便覽言沅州所招溪洞百三十宜從本郡隨事要東勿建官置

戍以爲民困自誠州至融江口可通西廣鹽以省北道餉餽悉從之使還爲河東河北轉運副使加直龍圖閣歷知河中應天府江淮發運使進寶文閣待制由桂徙廣又改渭州夏人入邊檄大將苗履禦之履稱疾移告立按正其罪竄諸房陵轅門肅然召知開封府至則拜戶部侍郎與蔡京論役法不合以龍圖閣直學士知太原夏人據橫山並河爲寨秦晉之路皆塞覽謀復取葭蘆戍阻險不得前夏人數萬屯境上覽下令吾兵少須滿五萬及西夏人聞而濟師覽不爲動相持益久忽令具糗糧嚴兵械曰敵至矣居

人物傳二 惟揚志卷之二十二

十三

數日果大入奮擊敗之遂城葭蘆而還策勲加樞密直學士覽雖立邊功議論多觸執政屢遭絀削歷知河南未與徙成都辭不行降爲寶文閣待制卒年五十九贈開府儀同三司謚文安有文集三十卷奏議二十卷子竢由徽猷閣待制至北京留守

吳及喬執中傳

吳及字幾道通州靜海人年十七第進士爲候官尉閩俗多自毒死以誣仇家官司莫能辨及悉爲讞正前後活五十三人提點刑獄移其法於一路辟大理寺檢法官徙審刑院詳議累遷太常博士是時仁宗

春秋既高無子及因推言闈寺以及繼嗣事至和元年上疏曰臣聞官師相規工執藝事以諫臣幸得待罪法吏輒原刑法之本以效愚忠竊惟前世肉刑之設斷肢體刻肌膚使終身不息漢文感緹縈之言易之鞭箠然已死而笞未止外有輕刑之意而實殺人之祖宗鑒既往之弊蠲除煩苛始用折杖之法新天下耳目茲蓋曠古聖賢思所未至陛下深惻民隱親覽庶獄歷世用刑無如本朝之平恕宜乎天降之祥而方當隆盛之時未享繼嗣之慶臣竊惑焉或者宦官太多而陛下未悟也何則肉刑之五一曰宮古人除

人物傳二

惟揚志卷之二十二

古

之重絕人之世今則宦官之家競求他子剿絕人理希求爵命童幼何罪陷於刀鋸因而夭死者未易悉數夫有疾而夭治世所羞况無疾乎有罪而宮前王不忍况無罪乎臣聞漢永平之際中常侍四員小黃門十人唐太宗定制無得踰百員且以祖宗近事較之祖宗時宦官凡幾何人今凡幾何人臣愚以謂胎卵傷而鳳皇不至宦官多而繼嗣未育也伏望順陽春生育之令濬發德音詳爲條禁進獻宦官一切權罷擅宮童幼寘以重法若然則天心必應聖嗣必廣召福祥安宗廟之策無先於此書奏帝異其言欲用

爲諫官而及以父憂去嘉祐三年始擢秘閣校理踰月改右正言復上疏曰帝王之治必敦骨肉之愛而以至親夾輔王室詩曰懷德維寧宗子維城故同姓者國家之屏翰儲副者天下之根本陛下以海宇之廣宗廟之重而根本未立四方無所繫心上下之憂無大於此謂宜發自聖斷擇宗室子以備儲副以服屬議之則莫如親以人望言之則莫如賢旣兼親賢然後優封爵以寵異之選重厚樸茂之臣以教導之聽入侍禁中示欲爲後使中外之人悚然瞻望曰宮中有子矣陛下他日有嫡嗣則異其恩禮復令歸邸

於理無嫌於義爲順弭覬覦之心屬天下之望宗廟長久之策也旣而又言開寶詔書內侍臣年三十無養父者聽養一子爲嗣并以名上宣徽院違者抵死比年此禁益弛大絕人理陰累聖嗣願詔大臣明示舊制上順天意以綏福祐明年遂權罷內臣進養子管勾登聞檢院又上書論政事謂倉廩空虛內外匱乏其弊在於官多兵冗請汰冗兵省冗官然後除民之疾苦因條上十餘事多施行之建請擇館職分校館閣書并求遺書於天下語在藝文志明年日食三朝及言日食者陰侵陽之戒在人事則臣陵君妻乘

夫四夷侵中國今大臣無姑息之政非所謂臣陵君
失在陛下淵默臨朝使陰邪未盡屏也后妃無權橫
之家非所謂妻乘夫失在左右親佞驕縱無節也疆
場無虞非所謂四夷侵中國失在將帥非其人爲敵
所輕也因言孫沔在并州苛暴不法燕飲無度龐籍
前在并州輕動寡謀輒興堡砦屈野之衄爲國深耻
沔繇此坐廢又言春秋有告糴陛下恩施動植視人
如傷然州郡官司各專其民擅造閉糴之令一路饑
則鄰路爲之閉糴一郡饑則鄰郡爲之閉糴夫二千
石以上所宜同國休戚而坐視流離豈聖王子育兆

民之意哉遂詔鄰州鄰路災傷而輒閉糴論如違制
律父之遷右司諫勾管國子監在職數年以勁正稱
遇事無小大輒言嘗請毋納羣臣上尊號出後宮私
身及非執事人毋以御寶白劄子賜近倖家人冠帔
及比丘尼紫衣并責執政大臣因循苟簡畏避怨謗
宜用唐李吉甫故事選拔賢俊約杜預遺法旌擢守
令復置將作監官屬專領營造論入內都知任守忠
陵轡駙馬都尉李瑋及干求內降會諫官陳升之建
請裁節班行補授下兩制臺諫官集議主鐵冶者舊
得補班行至是議罷之既定藁及與御史沈起輒增

注與國軍磁湖鐵冶如舊制主磁湖冶者大姓程叔良也翰林院學士胡宿等即劾及與起職在臺諫而爲程氏經營占錮恩例請詔問狀皆引伏及出爲工部員外郎知廬州進戶部直昭文館知桂州卒錄其弟齊爲太廟齋郎及當官有守初爲檢法官三司請重鑄鐵錢法至死下有司議及爭不可主者恚曰立天下法當由一檢法耶及曰義理爲先安有高下卒不爲詘

喬執中字希聖世爲高郵臨澤人乃漢太尉橋玄之後也姓初從木唐代宗朝吏部有選人橋叔獻喬欽

人物傳二

惟揚志卷之二十一

十七

道以明經出身同甲而奏帝見喬橋二姓音同字異批其狀曰大高爲喬理甚明白加之以木一何贅乎並今去木爲喬自是喬姓無從木者父竦字立之以鄉先生教授州里從之學者多以文行知名一時而淮南數千里間其視高郵若齊魯蓋自竦發之孫龍圖覺亦其徒也卒贈官至朝奉大夫執中初入太學補五經講書五年不謁告王安石爲群牧判官見而器之命子弟與之游治平四年擢進士調須城主簿時河役大興部役者不得人一夕譟而潰因致大役執中往代終帖然富民賂吏所剽橋所居以網市利

執中疏其害使者入吏言使成之執中曰官可去橋不可拘也卒不能奪王安石為政引執中編脩熙寧條例選提舉湖南常平章惇討五溪檄執中取大田離子二峒峒路險絕期迫執中但走一校諭其酋即相率歸命錄功當遷秩辭以及父母就徙轉運判官召為司農丞提點開封縣鎮諸縣牧地民耕歲久議者將取之當夷丘陵伐桑柘萬家相聚而泣執中請于朝神宗詔復予民改提點京西北路刑獄時河決廣武埽危甚相聚莫敢登執中不顧立其上衆隨之如蟻附不日埽成元祐初為吏部郎中請選人由縣

人物傳二

淮揚志卷之二十二

六

令錄事參軍致仕者升朝籍得封其親兼除王府侍講翊善遷起居舍人起居郎權給事中有司以天下讞獄失出入者同坐執中駁之曰先王重入而輕出恤刑之至也今一旦均之恐自是法吏不復肯與生此非好生洽民之意也進中書舍人邢恕遇赦甄復執中言恕深結蔡確鼓倡扇搖今復其官燿疑中外遷給事中刑部侍郎紹聖初上官均摭執中為呂大防所用以寶文閣待制知鄆州京東西路安撫使執中寬仁屢典刑獄雪活以百數與秦孫齊名號三賢明年夢神人畀以騎都尉詰曰為客言之少焉談笑

而逝年六十三

孫錫孫洙傳

孫錫字昌齡廣陵人遷真州以天聖二年進士起家
和州歷陽無爲巢縣主簿部使者及兩制以御札舉
者十餘人改鎮江軍節度推官知杭州仁和縣籍取
兇惡戒以不改必窮極案治而撫衆一仁恕故縣人
畏且愛之以父喪去三年用舉者以集慶軍節度掌
書記充國子監直講預校史記前後漢書南北史脩
集韻選蘇王宮伴讀教導有法宗室召燕飲未嘗往
居頃之改著作佐郎當罷又留爲國子監丞講讀七

人物傳二

惟揚志卷之二十二

十九

年用舉者召試集賢校理同知太常禮院判吏部南
曹登聞鼓院爲開封府推官賜緋魚坐考鎖廳進士
舉籍中有不中格者兩人降監和州清酒務當是時
宰相龐籍爲樞密使薦宜侍講禁中方召而錫以謫
去迄明堂恩召還同判尚書刑部先時主者多持事
往決於中書錫獨視法如何不往戎州人向吉等操
兵賈販恃其衆所過不輸物稅州縣捕逐皆敗走成
都鈐轄司奏請不以南郊赦除其罪從之逮捕親屬
繫獄至更兩赦有詣闕訴者刑部詳覆官以爲特勅
遇赦不原者雖數赦猶論如法錫獨奏釋之凡釋百

二十三人其議法多如此復為開封府推官當隨尹
奏事仁宗問大辟幾何且以慎刑愛人為戒錫因奏
開封重於編勅而當改者數事仁宗皆以為然他日
問尹以錫姓名稱之於是貴戚女使有奏讞上薄其
罪付錫見決曰此人平恕可任也道士趙清貺出入
宰相龐籍家受賕御史以劾龐府治實清貺自為龐
不知也清貺坐杖配沙門島行兩日死御史又劾府
希宰相旨故杖清貺殺之滅口仁宗亦疑乃悉罷知
府推判官而以錫知太平州初清貺事獨判官王礪
勘決錫不自辨也未幾仁宗即悟罷者皆復而以錫

提點淮南路刑獄在淮南二年所活大辟十三人考
課為天下第一所舉多善士未嘗聽請囑還為三司
戶部判官求知宣州許之特詔秩祿視轉運使至則
召五縣令約以州所下書有不便封還故縣得自為
政而州無事且滿州人詣轉運使提點刑獄乞留還
又知舒州發常平廣惠倉以活陳許潁蔡流人及歸
計口量遠近給食遺去去者率錢買香焚之府門以
祝至或感泣初提點刑獄恐聚流人為盜又惜常平
廣惠倉數牒止錫不聽申以手書又不聽佐屬皆爭
曰不可錫行之自若比代去州人闔城門留之薄暮

爭門乃得出遂以老致仕於是官至尚書度支郎中散官至朝奉郎勲至上柱國神宗即位遷司封賜金紫熙寧元年卒年七十八孫氏世爲廣陵富姓再榮兄弟五人其季婦有子寡欲分財者以義譬解不得乃悉推田地與諸兄弟獨攜錫居建安軍揚子故今爲真州人后諸兄弟破產而再榮居揚子又卒爲富姓爲錫千里迎師立學舍市書至六七千卷錫感勵誦習忘寢食年十九舉進士開封第二坐同保匿服罷而再舉又第二當是時以文學稱天下及仕號爲忠厚正直終身未嘗言利老而貧不以爲悔鄉人尤

人物傳二

惟揚志卷之二十二

三十一

歸其長者有文集二十卷

洙字巨源錫第四子也少奇邁羈非能文十九擢進士第補秀州法曹喪母服除調於潛令包拯歐陽脩吳奎舉應制科進策五十篇指陳政體明白剴切韓琦讀之太息曰痛哭流涕極論天下事今之賈誼也與蘇軾兄弟李邦直同在薦列再遷集賢校理知太常禮院治平中求言以洙應詔疏時弊要務十七事後多施行兼史館檢討同知諫院乞增諫員以廣言路凡有章奏輒焚其藁雖親子弟不得聞王安石主新法多逐諫官御史洙知不可而鬱鬱不能有所言

但力求補外得知海州免役法行常平使者欲加緡錢以取贏爲功沫力爭之方春旱發運使調民濬漕渠以通鹽舸沫持之不下三上奏乞止其役旱蝗爲害致禱于胸山徹奠大雨蝗赴海死尋幹當三班院三班員過萬數功罪籍不明前後抵牾左右出入爲姦沫革其甚者八事定爲令同脩起居注進知制誥先是百官遷敘用一定之詞沫建言羣臣進秩事理各異而同用一詞至或一門之內數人拜恩名體散殊而格以一律苟從簡便非所以暢王言重命令也詔自今封贈陰補每大禮一易他皆隨等撰定元豐

人物傳二

惟揚志卷之二十二

二十三

初兼直學士院澶州河平作靈津廟詔沫爲之碑神宗獎其文遷翰林學士纔月得疾時叅知政事闕帝將用之數遣中使尚醫勞問入朝期日沫少愈習拜跽于家僮不能興竟卒年四十九帝臨朝嗟惜常賻外賜錢五十萬沫博聞強識明練典故論述今昔秩秩有章雖對親狎亦無鄙語文辭典麗有西漢風象方以承輔期之不幸蚤世時人憫焉

杜鎬吳敏傳

杜鎬字文周其上世居杜陵五世祖勝徙家揚子鎬性好學博貫經史舉明經釋褐除集賢校理入直澄

心堂初仕江南李氏國亡乃復仕宋授千乘簿太宗
即位耆儒多薦其能改國子監丞崇文檢討適將祀
南郊羣出宰相趙普問鎬對曰當祭而日食猶廢况
謫見如此乎普言於上即罷其禮遷著佐改太子贊
善賜緋魚歷殿中丞國博加秘校方是時承平右文
鎬以博學數被禮遇朝廷每有疑議輒咨訪焉一日
帝問西漢賜予悉用黃金而近代爲難得之貨何也
鎬曰當時佛事未興故金價甚賤又聞天寶黎園事
敷奏詳悉遷駕部員外郎判太常禮院與編次館閣
書籍賜金紫改直秘閣會脩藝祖實錄命鎬檢討故

人物傳二

惟揚志卷之二十一

二十三

事以備訪問景德初置龍圖閣待制因以命鎬加都
官郎中從幸澶淵遇懿德皇后忌日疑軍中鼓吹之
禮時鎬先還命馳騎問之鎬以武王載木主伐紂前
歌後舞爲對預脩冊府元龜改司封進拜右諫議大
夫龍圖直學士賜襲衣金帶班樞密直學士下時特
置此職以處鎬儒者榮之初真宗問積食原於何代
對曰漢文帝鍾愛太子景帝命太官每具兩積食以
進此其始也大中祥符中帝深以澶淵之盟爲辱王
欽若諛之曰惟有封禪可以滌耻然當得天瑞而後
可前代亦有以人力爲之者帝猶豫以問鎬曰古謂

河出圖洛出書果何事耶鎬未喻帝旨應曰此聖人以神道設教耳帝意乃決命鎬同詳定東封儀注遷給事中由是天書屢降三年又置本閣學士陞鎬工部侍郎充其職帝賜宴秘閣御作詩榮之進禮部侍郎累官權判尚書省事上柱國京兆郡開國侯食邑賜金紫卒年七十六錄以子渥及三孫官鎬博聞強記凡所檢閱必戒書史云某事某書在某卷幾行覆之一無差誤朝廷每得異書多召問之鎬常手疏本末以聞士大夫有所著述多訪以故事雖晚進卑品應答無倦年踰五十猶日治經史數卷館中寓直四

人物傳二

惟揚志卷之三

二十四

鼓即起誦讀所居僻陋僅蔽風雨燕居多具醪饌以待賓友和易清素士類重之嘗受詔與邢昺等校定諸經正義莊子爾雅釋文考正尚書論語孝經謬誤其於文苑英華太平御覽皆與脩焉

吳敏字元中真州人大觀二年辟雍私試首選蔡京喜其文欲妻以女敏辭因擢浙東學事司幹官為秘書省校書郎京薦之充館職中書侍郎劉正夫以敏未嘗過省不可京乃請御筆特召上殿除右司郎官御筆自此始違者以大不恭論繇是權倖爭請御筆而繳駁之任廢矣升中書舍人同脩國史改給事中

敏爲蔡京所引鄭居中方秉政敏數言其失居中銜之坐駁盜當死者罷爲右文殿脩撰提舉南京鴻慶宮久之復爲給事中權直學士院兼侍講徽宗將內禪蔡攸探知上意引敏入對宰臣執政皆在敏前奏事且曰金人渝盟舉兵犯順陛下何以待上蹙然曰柰何時東幸計已定命戶部尚書李棨先出守金陵敏退詣都堂言曰朝廷便爲棄京師計何理也此命果行雖死不奉詔宰執以爲言棨遂罷行皇太子除開封尹上去意益決敏因奏對得請遂薦李綱綱嘗語敏以上宜傳位如唐天寶故事故薦之冀上或有

人物傳二

惟揚志卷之三十一

三五

所問也明日宰臣奏事徽宗獨留李邦彥語敏所對命除門下侍郎輔太子敏駭曰臣旣畫計從陛下巡幸陛下且傳位而臣受不次之擢臣曷敢上曰不意卿乃爾敢言於是命敏草傳位詔欽宗旣立上皇出居龍德宮敏與蔡攸同爲龍德宮副使遷知樞密院事拜少宰敏主和議與太宰徐處仁議不合紛爭上前御史中丞李回劾之與處仁俱罷爲觀文殿大學士醴泉觀使頃之言者論其庇蔡京父子出知揚州再貶崇信軍節度副使涪州安置建炎初移柳州俄用范宗尹薦起知潭州敏辭免西宮祠乃提舉洞霄

宮紹興元年復觀文殿大學士為廣西湖南宣撫使卒于官

呂溱王昴李易傳

呂溱字濟叔揚州人進士第一通判亳州直集賢院同脩起居注坐預進奏院宴飲出知徐楚舒三州復脩起居注儂智高寇嶺南詔奏邸毋得輒報溱言一方有警使諸道聞之共得為備今欲人不知此何意也進知制誥又出知杭州入為翰林學士疏論宰相陳執中姦邪仁宗還其疏溱曰以口舌論人是陰中大臣也願出以示執中使得自辨未幾執中去溱亦

人物傳二

惟揚志卷之二十二

二十六

以侍讀學士知徐州賜宴資善堂遣使諭曰此特為卿設宜盡醉也詔自今由經筵出者視為例徙成德軍時方開六塔河宰相主其議會地震溱請罷之以答天戒溱豪放忽事與都轉運使李參不相能還判流內銓參劾其借官麴作酒以私貨往河東貿易及違式事下大理議溱實無是而外廷紛然謂溱有死罪帝知其過輕但貶秩知和州起知池州江寧府復集賢院學士加龍圖閣直學士知開封府時為京尹者多不稱職溱精識過人辨訟立斷豪惡斂跡嘗以職事對神宗察其有疾色勉以近醫藥已而果病改

樞密直學士提舉醴泉觀遂卒年五十五贈禮部侍郎帝悼念之詔中書曰溱立朝最孤知事君之節絕跡權貴故中廢十餘年人無言者方擢領要劇而奄忽淪亡家貧子幼遭此大禍必至狼狽宜優給賻禮官庀其葬以勵臣節勅其婦兄護喪歸溱開敏善議論一時名輩皆推許然自貴重在杭州日接賓客不過數語時目爲七字舍人云

王昴揚州人少以文學知名政和八年徽宗策進士時嘉王楷考在第一上不容令魁多士昴以第二陞榜首除秘書省校書郎宣和元年昴言今後除卿監

人物傳二

惟揚志卷之三

二十七

未經上殿乞令如郎官之法詔初除郎官以上職事未經上殿者並令閣門引見高宗即位除尚書工部員外郎遷起居舍人秘書少監時御府頒降書籍四百九十二種曾昉家藏書二千六百餘卷昴請分爲經史子集四庫委官校讐其脫落僞舛者以別本叅考補寫畢則繳進除徽猷閣待制知台州主管江州太平觀後卒于家

李易字順之揚州人好學多聞以清素自立高宗駐蹕惟揚策試進士九月御崇政殿唱第易爲第一高宗曰聞易甚貧寄食於人輔臣對曰易揚州學士郡

序正錄學業必優易以上憂勞辭聞喜宴從之授僉書江陰軍判官三年金虜犯江陰至夏港距城數里守臣胡紉遺將拒敵且謂易曰吾曹義當死城郭君有母宜亟避之易歸告其母蔣氏曰我去則汝必無堅守之志死生當與汝同之聞者感泣既而虜疑有備亟引去紹聖元年爲太常博士會孟庾韓世忠辟易叅謀官轉工部員外郎爲太常少卿自建炎惟揚之變宗正寺所掌四書曰玉牒曰仙源積慶圖曰宗藩慶繫圖曰宗支屬籍皆逸於江滸至是易請編次玉牒從之遷中書舍人除淮東安撫司叅議官易辭

人物傳二

惟揚志卷之三十二

三

不行改知常州又改直秘閣知揚州易以本貫辭不許除起居舍人會宰相秦檜主罷兵召岳飛赴行在命易見韓世忠諭旨遷起居郎中書舍人給事中俄除敷文閣待制提舉江州太平觀以疾自請卒于秀州

王惟熙王觀王觀王俊又傳

王惟熙字國和如臯人景祐元年登第調鹽城尉州嘗有羣飲疑獄久不決州以屬尉惟熙脫械勞之酒食問曰汝用左手而死者傷右尚何辭囚曰仇此人久矣幸其醉扶之官得其情死不恨擢大理寺詳斷

官持法堅正奏案成卿使易之惟熙拒之卿置酒召其屬曰王詳斷易其奏耶惟熙曰否卿怒戒吏曰王詳斷如是不可共事矣促奏罷之一坐爲恐惟熙徐曰事顧是否何如罷非所恤奏亦不報爲審刑院詳議官泗州船兵坐盜米死惟熙議以爲米來遠盜者非一日也如必其贓於所販之州即殺人多矣覆之免五人儂智高反掠嶺南諸州吏棄城者數十人皆麗於法惟熙議州所守者城固而兵足用也嶺南兵與城皆不足恃奈何以常法致之死上亦憫之數十人者皆免遷判大理寺累官司封員外郎嘉祐七年

人物傳二

惟揚志卷之二十二

二十九

卒惟熙博覽古今天性平恕雖爲法官專務原人情有文集十五卷

覲字明叟第進士熙寧中爲編脩三司令式刪定官不樂久居職求潤州推官二浙旱郡遺吏視苗傷承監司風旨不敢多除稅覲受檄覆按嘆曰旱勢如是民食已絕倒廩贍之猶懼不克濟尚可責以賦耶行數日盡除之監司怒捃摭百出會朝廷遣使賑貸覲請見爲言民間利病使者喜歸薦之除司農寺主簿轉爲丞司農時爲要官進用者多由此選覲拜命一日即求外韓絳高其節留檢詳三司會計絳出潁昌

辟簽書判官坐在潤公誤免屏居累年起爲太僕丞
徒太常哲宗立呂公著范純仁薦其可大任擢右正
言進司諫上䟽言國家安危治亂係於大臣今執政
八人而姦邪居半使一二元老何以行其志哉因極
論蔡確章惇韓縝張璪朋邪害正章數十上相繼斥
去入劾竄呂惠卿朝論以大姦旣黜慮人情不安將
下詔慰釋之且戒止言者覲言誠出於此恐海內有
識之士得以輕議朝廷舜罪四凶而天下服孔子誅
少正卯而魯國治當是之時不聞人情不安亦不聞
出命令以悅其黨也誠爲陛下惜之夏主新立有輕

中國心覲曰小羌窺我厭兵故桀驚若是然所當憂
者不在今秋而在異日所當謹者不在邊備而在廟
謨翁張取予之權必持重而後可洮東擒鬼章檻至
闕下覲曰老羌雖就擒其子統衆如故疆土種落未
減於前安可遽戮以賈怨宜處之洮岷秦雍間以示
含容好生之德又䟽將帥非其人者請易之茶鹽之
害民者請革之至逋債賑贍賦斂科需皆指陳其故
差役法復行覲以爲朝廷意在便民而議者遂謂免
役法無一事可用夫法無新舊惟善之從因采掇數
十事於差法有助可以通行者上之遂論青苗之害

乞盡罷新令而復常平舊法神宗復唐制諫官分列
兩省至是大臣議徙之外門而以其直舍爲制勅院
各防漏泄實不欲使與給舍相通覲爭之曰制勅院
吏舍也奪諫省以廣吏舍信胥吏而疑諍臣何示不
廣也乃不果徙覲在言路欲深破朋黨之說朱光庭
訐蘇軾試館職策問呂陶辨其不然遂起洛蜀二黨
之說覲言軾之辭不過失輕重之體爾若悉攷同異
深究嫌疑則兩岐遂分黨論滋熾帝深然之置不問
尋改右司員外郎未幾拜侍御史右諫議大夫坐論
尚書右丞胡宗愈出知潤州加直龍圖閣知蘇州州
人物傳二

惟揚志卷之三

三

有狡吏善刺守將意以撓權前守用是得譏議覲窮
其姦狀寘于法一郡肅然徙江淮發運使入拜刑戶
二部侍郎與豐稷偕使遼爲遼禮重紹聖初以寶文
閣直學士知成都府地膏腴無閑田以葬覲索官地
表爲墓田䟽治城渠民德之號王公渠徙河陽貶少
府監分司南京又貶鼎州團練副使徽宗即位還故
職知末興軍過闕留爲工部侍郎遷御史中丞改元
詔下覲言建中之名雖取皇極然重襲前代紀號非
是宜以德宗爲戒時任事者多乖異覲言祖宗作法
于前子孫當守于後至於時異事殊須損益者損益

之於理固未爲有失也當國者忿其言遂改爲翰林
學士四月朔日食帝下詔責躬覲當制有惟德弗類
未足以當天心之語宰相去之乃力請外以龍圖閣
學士知潤州徙海州罷主管太平觀遂安置臨江軍
覲清修簡澹人莫見其喜愠持正論始終再惟謹逐
不少變無疾而卒年六十八紹興初追復龍圖閣學
士有諫疏三十卷奏議三十卷雜文五十卷內制三
十卷

觀字通叟惟熙兄惟清子也天資英邁洽聞強記善
屬文下筆累百千言不復潤色而華藻粲然至和嘉
祐間與從弟覲從胡先生學于上庠聲稱籍甚秦少
游謂其昆弟高才力學無與比者及試開封府相繼
爲第一覲中嘉祐二年第遷大理寺丞知江都縣卒
所著有天鬻子府元集及揚州賦

俊又字堯明覲從子也游學京師資用乏或薦之童
貫欲厚聘之拒不答林靈素設講席寶籙宮詔兩學
選士問道車駕將臨視推恩司成以俊又及曹偉應
詔俊又辭人曰此顯仕捷徑也不可失俊又曰使辭
不獲命至亦不拜倘見困辱則以死繼之逮至講所
去御幄跬步內侍呼姓名至再俊又但望幄致敬不

出次呼曹偉偉回首俊又目之亦不出既罷皆為之懼俊又處之恬然以太學上舍選奏名列下徽宗親程其文擢為第一蔡京邀使來見曰一見我左右之史可立得俊又不往僅拜國子博士居二年乃得改太學博士鄆王謁先聖有司議諸生門迎俊又曰此豈可施於人臣哉禮如見宰相足矣乃序立敦化堂下及王至猶辭不敢當進吏部員外郎嘗入對帝問卿知前所以親擢乎蓋主司之意不一是以天子自提文衡也衛膚敏吳安國今安在具以對即召為館職而遷俊又右司員外郎為王黼所惡以直秘閣知

人物傳二

惟揚志卷之三

三

岳州卒年四十七俊又與李祈友善首建正論於宣和間當是時諸公卿稍知分別善惡邪正兩人力也俊又有文集易說各十卷

崔希甫崔公度傳

崔希甫高郵人有文武才略待價不仕沈承禮攻江南始請為府判官江南平潘美薦於太宗召見拜太子中允面賜金紫知原州召還拜監察御史凡朝廷更置諸道事務指揮沿邊將帥多命乘傳處分朝中呼為受事賜金帶仍命懸魚時號重金御史子琮擢進士第

公度字伯易希甫之孫也閉戶讀書嘗作太行山賦歐陽公題其後曰司馬子長之流也韓魏公因薦其守道甚篤文章雄奇贍逸英宗召問據經以對欲擢公館閣未幾特授彰德軍節度推官秘書郎國子監直講秘書監起居郎知海潁蔡潤宣通六州嘗撰曲轅集四十篇詩賦百詠官終朝散大夫直龍圖閣卒葬淮南

孫長卿許元鍾離松傳

孫長卿字次公揚州人以外祖朱巽任爲秘書省校書郎天禧中巽守雍命隨所取浮圖像入見仁宗方

人物傳二

惟揚志卷之二十二

三四

權聽天下事嘉其少敏占對欲留侍東宮辭以母疾詔遷官知楚州糧料院郡倉積米五十萬陳腐不可食主吏皆懼法毋敢輕去長卿爲酌新舊易之吏罪得免通判河南府秋大雨軍營壞或言某衆將叛洛中謹然長卿馳諭之曰天雨敗屋廬未能葺汝輩豈有欲叛意得無有乘此動吾軍者耶推首惡一人誅之留宿其所衆遂定詔汰三陵奉先卒汰者羣謀府下長卿矯制使還而具言不可汰之故朝廷爲知和州民訴人殺第長卿察所言無理問其貲曰上等也家幾人曰惟此第爾曰然則汝殺第也鞫之服郡人

神之提點益州路刑獄歷開封鹽鐵判官江東淮南河北轉運使江浙荆淮發運使歲漕米至八百萬或疑其多長卿曰吾非欲事羨贏以備饑歲爾議者謂楚水多風波請開盱眙河自淮趣高郵長卿言地阻山回繞役大難就事下都水調工數百萬卒以不可成罷之時又將弛茶禁而收其征召長卿議長卿曰本祖宗權茶蓋將備二邊之糴且不出都內錢公私以爲便今之所行不足助邊糴什一國用耗矣乃條所不便十五事不從改陝西轉運使踰年知慶州州據險高患無水嘗疏引澗谷汲城中未幾復絕長卿

人物傳二

惟揚志卷之二十一

三五

鑿百井皆及泉泥陽有羅川馬嶺上構危棧下臨不測之淵過者惴恐長卿訪得唐故道闢爲通塗加集賢院學士河東都轉運使拜龍圖閣直學士知定州熙寧元年河北地大震城郭倉庾皆隕長卿盡力繕補神宗知其能轉兵部侍郎留在任明年卒年六十六性廉潔定州當得園利八十萬悉歸之公旣歿詔中使護其喪歸葬

許元字子春其先宣人以父恩廕補郊社齋郎稍遷太子中舍知如臯縣徙居海陵養母盡孝元喜修廢壞長於治財自元昊叛西兵久無功天下勞弊三司

使言其能以王權貨先時京師粟少而江淮歲漕不給叅知政事范仲淹謂元獨可辦以殿中丞爲江淮等路發運判官元曰以六路七十二州之粟不能足京師者吾不信也至則治千艘浮江而上所過州縣留三月食其餘悉發而州縣之廩遠近以次相補由是不數月京師足食旣而嘆曰此可爲於乏時然歲漕不給者有司之職廢也乃考故事明約信令發歛轉徙至於風波遠近遲速賞罰皆有法江湖數千里外談笑治之不擾不勞而用以足陞副使已而爲使賜進士出身待制天章閣先是歲漕京師者常六百萬石其後十餘歲益不足至元爲之歲必六百萬常餘百萬以備非常及去職人有勸其進羨餘者元曰吾豈聚歛者哉敢用此以希寵仁宗嘗謂執政曰發運使總六路之廣其財貨調用幣帛穀粟歲千百萬宜得其人而又任之元在職十有三年已而乞守郡乃以知揚州越州又徙泰州卒年六十九

鍾離松字其紹真州人紹興十八年登進士第乾道

間以朝請郎知興化軍事爲人退然自下治郡事每窮日之力而繼以火馭吏牧民並善嘗奏蠲民租詔爲盡除之真士稱良牧者以松爲首焉

朱壽昌傳

朱壽昌字康叔揚州天長人以父巽廕守將作監主簿累調州縣權知岳州州濱重湖多水盜壽昌籍民船使相伺察出入必以告盜發驗船所向窮討之盜爲少弭富弼韓琦爲相遣使寬恤民力擇壽昌使湖南或言邵州可置采金者有詔興作壽昌言州近蠻金冶若大發蠻必爭自此邊境多事且廢良田數百頃非敦本抑末之道詔亟罷之知閬州大姓雍子良屢殺人挾財勢得不死至旦之又殺人而賂其里民出就吏獄具壽昌覺其奸引囚詰之悉得其情囚具

人物傳二

惟揚志卷之二十二

又三

以實對立取子良正諸法郡稱爲神壽昌母劉氏巽妾也巽守京兆劉氏方娠而出壽昌生數歲始歸父家母子不相聞五十年行四方求之不置飲食罕御酒肉言輒流涕凡力所可致無不爲者熙寧初棄官入秦曰不見母吾不返矣遂得之于同州劉時年七十餘矣嫁党氏有數子悉迎以歸京兆錢明逸以其事聞詔還就官由是以孝聞天下壽昌以養母求通判河中府數歲母卒壽昌居喪幾喪明旣葬有白鳥集墓上拊同母弟妹益篤後徙居高郵今有彰孝里卒年七十

查道傳

查道字湛然其先徽人道少以詞學稱奉母渡江居如臯以孝聞母病思鰕羹方冬不獲道泣禱于河鑿冰取之得鰕尺許以進母疾尋愈端拱初舉進士解褐爲館陶尉曹彬鎮徐州辟爲從事深被禮遇改興元觀察推官寇準薦其才授著作佐郎淳化中蜀寇叛命道通判遂州至道二年有使兩川者以道治狀聞優詔嘉獎遷秘書丞徙知果州時寇黨何彥忠等尚依險自固穀弓露刃詔諭之未下咸請發兵殄之道曰彼以懼罪欲延命須臾爾其類豈無詿誤耶遂

人物傳二

惟揚志卷之二十二

三七

微服單馬不持弓矢攜數卒直趨賊所賊悉驚畏持滿外嚮道神色自若踞胡牀而坐諭以詔意或識之曰郡守也嘗聞其仁是寧害我者則相率投兵請罪悉給券歸農驛奏璽書褒諭咸平四年代歸賜緋魚出知寧州會舉賢良方正之士李宗諤以道名聞策入第四等拜左正言直史館未幾出爲西京轉運副使六年始令三司使分部置副召入拜工部員外郎充度支副使賜金紫有故人卒貧甚質女於人道爲贖之嫁士族縉紳間服其篤行好學默坐終日服用極儉享年六十四有文集二十卷

陳知微潘及甫王幾傳

陳知微字希顏高郵人咸平五年進士將作監丞通判歙州擢爲著作佐郎直史館累轉京東轉運副使奏還東平監所侵民田六百八十家又決古廣濟河通運路罷夾黃河歲減夫役數萬遷右司諫徙荆湖南路轉運使召還拜比部員外郎知制誥淮南饑遣知微巡撫所至按視儲糧察諸官吏能否使還判吏部銓兼刑部又判司農寺糾察在京刑獄天禧二年加玉清昭應宮判官卒年五十錄其子舜卿爲太常寺奉禮郎給俸終喪知微儀狀甚偉沉厚不務曠察

人物傳二

惟揚志卷之二十二

三六

有集三十卷子堯卿大中祥符五年進士及第

潘及甫字憲臣博通經史厲志文行聞胡安定倡學於湖往從之安定見其文喜曰非諸生比也遂補學職妻以女弟慶曆中與兄希甫同登進士爲懷仁尉筠州判官及知分寧霍丘壽春三縣所至咸著政績遷秘書丞充楚王宮太學教授律宗室以禮法神宗嘉之後以屯田員外郎通判江州遷左朝散郎平生不脩邊幅賢士大夫樂與之游後學皆有所矜式親族之貧寡孤幼者皆賴其撫卹晚得目疾每命子姪執策讀於前終日傾耳危坐無倦容未卒前一日猶

卧聽周書漢史口占爲詩以遺親友而卒
王幾字彥成江都人知舒城未赴丁父憂王安石知
其才選宰長洲縣縣號難治政剛則跲弱則廢幾平
其政弛張以時卒之懾服豪強貧細得所歲饑賑
救之策人物按堵權勢者欲侵撓之執度不回治聲
聞京師仕至大理寺丞

嘉靖惟揚志卷之二十二

人物傳二

惟揚志卷之二十二

三九